

08/09/1997

Selangor guna multimedia bahas usul ekonomi

BUAT kali pertama dalam sejarah, multimedia digunakan pada Perhimpunan Agung Umno di Pusat Dagangan Dunia Putra (PWTC) di sini, semalam.

Peralatan komunikasi itu digunakan oleh seorang wakil Perhubungan Umno Selangor ketika membahaskan usul ekonomi.

Senator Datuk Ghazi Ramli memulakan perbahasan dengan menyatakan beliau akan menggunakan multimedia sebagai menyahut seruan Presiden Umno, Datuk Seri Dr Mahathir Mohamad yang mahu rakyat memanfaatkan teknologi maklumat (IT).

Dengan membahagikan perbahasannya kepada enam tajuk utama, beliau menggunakan multimedia untuk memperlihatkan fakta, petikan, gambar dan teks daripada majalah asing kepada perwakilan.

Semua fakta, petikan, gambar dan teks yang dibentangkannya boleh dilihat pada layar besar di dewan persidangan dan televisyen litar tertutup di luar dewan.

Antara petikan yang dipaparkan menerusi peralatan multimedia ialah kritikan Dr Mahathir terhadap ahli kewangan Amerika Syarikat, George Soros berhubung manipulasi nilai ringgit.

Pada akhir perbahasannya, Ghazi mengadakan demonstrasi ringkas kepada perwakilan mengenai penggunaan CD-ROM untuk mempelajari dan memahami al-Quran.

Enam tajuk yang dikemukakan oleh Ghazi ialah kekuatan negara dan cabaran, kebangkitan Asia dan perkongsian pintar, sektor strategik membabitkan IT, penswastaan dan pengagihan, golongan menengah Bumiputera dan kemampuan Bumiputera bersaing.

(END)